

Projek RTB akan diperbaiki

WARTAWAN SINAR HARIAN
29 Disember 2014

GUNUNG SEMANGGOL - Kadar taburan hujan yang berkurangan sejak, kelmarin menyebabkan catatan paras air takungan di Empangan Kolam Bukit Merah, di sini menyusut di bawah paras bahaya.

Pengarah Jabatan Pengairan dan Saliran (JPS) Perak, Datuk Ir Abdul Razak Dahalan berkata, berikutan pengurangan mendadak kadar taburan hujan, perlepasan air takungan ke Alur Limpah utara di Empangan Kolam Bukit Merah, di sini turut dikurangkan kepada 2,500 kaki padu sesaat, berbanding perlepasan pada kadar 2,700 kaki padu sesaat dicatatkan sebelum ini.

Menurutnya, memandangkan paras air kolam mencatatkan penyusutan, pihaknya yakin keadaan banjir di daerah Kerian akan semakin pulih sekiranya kadar taburan hujan berterusan mencatatkan penurunan bermula hari ini (semalam) sehingga 29 Disember.

"Bermula hari ini (semalam), JPS jangka kadar taburan hujan akan kembali meningkat dan pihak kami bersiap-sedia menghadapi segala kemungkinan gelombang banjir kali ketiga dalam tempoh dua hari itu.

"Bagaimanapun, berdasarkan keadaan semasa, kemungkinan berlaku gelombang ketiga mungkin dapat dielakkan memandangkan keadaan cuaca dan kadar taburan hujan tidak menunjukkan peningkatan sehingga setakat ini.

"Sama-sama kita berdoa meminta keadaan cuaca normal seperti biasa dan bencana banjir akan semakin berkurangan dalam kadar segera," katanya ketika mengetuai sesi taklimat mengenai status terkini Empangan Kolam Bukit Merah, di sini kepada Sultan Perak, Sultan Nazrin Muizzuddin Shah yang mencemar duli menziarahi mangsa banjir di Sekolah Kebangsaan (SK) Bukit Merah, di sini semalam.

Turut serta, Menteri Besar Perak, Datuk Seri Dr Zambry Abd Kadir dan Setiausaha Kerajaan Negeri Perak, Datuk Abdul Puhat Mat Nayan.

Mengenai keadaan struktur ban dibina melalui projek Rancangan Tebatan Banjir (RTB) Kerian yang dikatakan bermasalah, Ir Abdul Razak mengakui terdapat beberapa ban di bawah projek itu yang dikenal pasti tidak kukuh dan perlu dibaik pulih bagi memastikan fungsinya mengurangkan kesan banjir di kawasan terlibat berkesan.

Menurutnya, JPS juga akan berusaha meninggikan paras mana-mana ban dikenal pasti berisiko dilimpahi air sungai berikutan paras binaannya yang rendah.

"Bagaimanapun, usaha membaik pulih dan menaik taraf pembinaan ban yang sudah dibina pastinya akan mempertingkatkan kos pembinaan yang sudah diperuntukkan bagi projek RTB sebelum ini.

"Justeru, JPS akan memohon penambahan peruntukan bersesuaian bagi memastikan keseluruhan infrastruktur dibina di bawah projek RTB Kerian bernilai RM350 juta kukuh dan terjamin mengurangkan kesan banjir di daerah ini," katanya.

Beliau berkata, dalam perkembangan projek RTB lain, JPS menjangka projek pembinaan RTB di kawasan Teluk Intan dan Kinta, masing-masing bernilai RM75 juta dan RM30 juta akan dimulakan pada tahun hadapan.

"Kita yakin masalah banjir melanda ketiga-tiga daerah ini dapat dikurangkan setelah semua projek pembinaan RTB dapat disiapkan mengikut masa ditetapkan," katanya.